



Božija milost u iskušenjima: strpljenje, zadovoljstvo i utjeha u teškoćama (Meka)

Hatib: dr. Bender ibn Abdulaziz Belile

12. rebiul-ahir 1445. god. po Hidžri / 27. oktobar 2023.

Hvala Allahu, Čije je dobročinstvo sveobuhvatno, i Čija su dobrota, blagost i blagodarnost potpune. Njemu pripadaju sve vrste zahvale, onako kako je On zadovoljan i bez kraja. Svjedočim da nema boga osim Allaha Jedinog, Koji nema druga, svjedočenjem onoga koji govori jezikom, vjeruje srcem i postupa tijelom, i svjedočim da je Muhammed, sallallahu alejhi ve sellem, Njegov rob i poslanik, čije je mjesto uzdignuto i posebno, neka su na njega Allahova milost, blagoslov i mir, i na njegovu porodicu i ashabe, i one koji ga slijede u dobročinstvu.

Oporučujem sebi i vama, o ljudi, da se samo Allaha bojimo. Bojte se Allaha, Allah vam se smilovao, bogobojažnima su pripremljeni Njegovi dženneti, a nepokornima Njegova vatra. "O vjernici, Allaha se bojte, i neka svaki čovjek gleda šta je za sutra pripremio i Allaha se bojte jer On dobro zna šta radite." (El-Hašr, 18)

O vjernici! Iskušenja, nedaće i neugodnosti popraćene su Allahovim darovima, milošću, dobrima i pomoći. "Ne volite nešto, a ono može biti dobro za vas; nešto volite, a ono ispadne zlo po vas. Allah zna, a vi ne znate." (El-Bekara, 216)

Ebu Hurejra, radijallahu anhu, prenosi da je Allahov Poslanik, sallallahu alejhi ve sellem, rekao: "Kome Allah želi dobro, iskuša ga." (Buhari)

Suhejb, radijallahu anhu, prenosi da je Allahov Poslanik, sallallahu alejhi ve sellem, rekao: "Čudan li je primjer vjernika! U kakvoj se god situaciji nađe, on je na dobitku i takav slučaj nije ni s kim drugim osim s vjernikom: ako ga zadesi kakvo dobro, on zahvali Allahu i bude nagrađen zbog toga, a ako ga zadesi šta loše, on se strpi, pa mu i to donese nagradu od Allaha." (Muslim)





Allahovi robovi! Allahova odredba kreće se između pravde i mudrosti, i između milosti i blagodati. Jedna od Vjerovjesnikovih, sallallahu alejhi ve sellem, dova bila je: "Allahu moj, ja sam Tvoj rob, sin Tvoga roba i sin Tvoje robinje, moj perčin je u Tvojim rukama, Ti ćeš mi presuditi i Tvoja odredba prema meni je pravedna." (Ahmed, a Ibn Hibban ga je ocijenio sahihom.)

Ebu Abbas ibn Ata, Allah mu se smilovao, rekao je: "Radost je u onome što je Allah odredio za nas, a nesreća i propast su u onome što mi određujemo sebi."

Kada Allah želi da iskuša nekoga, On ga pripremi za to iskušenje, pomogne mu da može nositi njegovu težinu, uputi ga na strpljivost koja će povećati njegovo vjerovanje i ojačati njegovo ubjeđenje, kako bi postigao veliku i lijepu nagradu. Uzvišeni kaže: "... samo oni koji budu strpljivi biće bez računa nagrađeni." (Ez-Zumer, 10)

Govoreći o stanovnicima Vječne kuće, Uzvišeni kaže: "... edenski vrtovi u koje će ući oni i roditelji njihovi i žene njihove i porod njihov – oni koji su bili čestiti – i meleki će im ulaziti na svaka vrata: 'Mir neka je vama, zato što ste trpjeli, a divno li je najljepše prebivalište!'" (Er-Ra'd, 23–24)

Najljepši dar Allahove pažnje i milosti prema ljudima, u neugodnostima i iskušenjima, jeste stepen zadovoljstva, koji postiže onaj koji je iskušan i strpi se u iskušenju, a taj stepen je duša svih stepeni u vjeri, izvor svakog dobra i blagoslova i stjecište Allahove milosti. Čovjek će u iskušenjima, ustrajno, biti zadovoljan Allahom, sve dok mu Allah, dželleš'anuhu, ne ukaže Svoje zadovoljstvo. Uzvišeni kaže: "Allah će biti njima zadovoljan, a i oni će biti Njime zadovoljni." (El-Bejjina, 8)

Omer ibn Hattab, radijallahu anhu, napisao je Ebu Musau el-Eš'ariju, radijallahu anhu: "Svako dobro je u zadovoljstvu. Ako možeš biti zadovoljan, budi, a ako to ne možeš, onda budi strpljiv." Ibn Kajjim, Allah mu se smilovao, rekao je: "Neki su pobožnjaci rekli: 'Budi zadovoljan Allahom u svemu što čini s tobom, jer On ti uskraćuje da bi ti dao, i iskušava te da bi te sačuvao, i daje ti bolest da bi te izliječio, i





usmrćuje te da bi te oživio, i zato ne dozvoli da ti prođe nijedan treptaj oka a da ne budeš zadovoljan Njime.”

Bojte se Allaha, pokoravajte Mu se, budite svjesni Njegovog nadzora i nemojte Mu biti nepokorni.

“O vjernici, bojte se Allaha i budite s onima koji su iskreni!” (Et-Tevba, 119)

O ti kojeg su okružile nedaće i iskušenja sa svih strana, znaj da se iskušenje nikada nije pojačalo a da nakon toga nije oslabilo, i nikada se neka stvar nije upotpunila a da se poslije toga nije počela smanjivati.

Neka ti Gospodar stalno bude pred očima i neka On bude strana prema kojoj ćeš okrenuti svoje srce, i neka čežnja za Njegovom pomoći bude tvoja najveća želja i nada. Ni na koga drugog ne možeš se ni osloniti ni pouzdati. Neka sabur bude tvoj moto i plašt, kojim ćeš se zaogrnuti, a čuvaj se očaja i beznadežnosti, jer će samo povećati tvoje iskušenje i nedaću, uništiti tvoju nagradu i navući na tebe srdžbu i kaznu.

Donosite salavate i selame, Allah vam se smilovao, na onoga na koga vam je Allah naredio da donosite salavate, rekavši: “Allah i meleki Njegovi blagosilju Vjerovjesnika. O vjernici, blagosiljajte ga i vi i šaljte mu pozdrav!” (El-Ahzab, 56) Allah podario blagoslov meni i vama u časnom Kur'anu, i okoristio mene i vas njegovim ajetima i mudrom opomenom. Rekoh ovo i od Allaha Uzvišenog tražim oprost za sebe, vas i sve muslimane od svakog grijeha, a tražite i vi, On mnogo prašta i milostiv je.

